

DESAROLLO DI LESAMENTO TRATA DEN WORKSHOP NA BNA

ORANJESTAD [AAN] E autornan hulandes, Yvonne Keuls y Jan Brokken hunto cu escritor arubiano Francis Kelly, a tene un workshop den Biblioteca Nacional tratando desarrollo di lesamento.

E workshop tabata den cuadro di e festival di película y buki hulandes. E workshop tabata bao direc-

cion di Kees van Beek, docente di idioma hulandes na Colegio Arubano, y tabata den bon ambiente.

Ampliamente a ser discuti entre escritornan y publico. Den un forma entusiasmo e autornan a conta di con nan a cuminsa lesa. Francis y Jan a duna di conoce cu ta nan tata tabata e forza estimulante pa nan lesamento, mientras cu pa Yvonne, tabata su mama.

Cu esaki nos por mira cu ta mayornan ta e principal poder pa lesamento. Na school e docentenan tambe ta hunga un rol importante, pero mester tene cuenta cu esaki ta cuminsa ora cu e mucha a cumpli 6 aña caba. Y realmente ya esaki ta un poco laat.

Ademas cu e lesnan na school ta mucho tecnico; e acento ta ser poni demasiado riba e aspecto di siña den lesamento, of riba e habilidad di idioma. E ora e placer den lesamento ta haya un aspecto secundario, y esey ta trece problema cun'e.

Francis a comproba for di experiencia cu hopi mucha tin un sorto di temor pa loke ta concerni lesamento. Nan no kier lesa, pasobra lesamento ta algo monótono, hopi "saai". Nan no conoce e placer den lesamento y consecuentemente e motivacion pa lesa no ta existi.

E problema central pa cu lesamento ta pues; con lo por transmiti e placer pa lesa den un mucha. Pa e autornan ta un hecho palpable, cu placer den lesamento no ta existi



asina-asina; bo ta cuminsa sinti placer ey, ora cu nan ta organisa hopi actividad pa loke ta concerni lesamento.

Tempo cu Yvonne ainda tabata maestra di school, e tabata haci esaki, componiendo musica pa su bukinan. E tabata toca piano y asina alumnonan tabata "hunga" e buki. Asina e alumnonan a haya e gusto den lesamento.

No ta tur hende lo ta di acuerdo cu e sistema aki, pero si ta importante pa mayornan cuminsa siña nan yiu-nan, for di tempo di baby caba, pa haya interes den buki; buki cu plachi, lesa storia pa nan, conta nan algo otro for di un buki.

Tambe nos maestra y maestronan por transmiti facilmente na nos muchanan, con placentero, con ameno, con dushi, lesamento ta! Pero...lamentablemente tin poco interes den seno di nos educadornan.

Na Biblioteca Nacional tin

un exposicion titula "Samen kijken, samen lezen" (mira hunto, lesa hunto). Esaki ta trata desaroyo di lesamento. Pa tur esnan cu ta anda cu mucha, tin consejonan masha valioso. Un recomendacion ta bay n'e pueblo pa bin mira e exposicion aki.